



Il cussegl da fundaziun: Sebastian Brändli, Jon Pult, Corin Curschellas, Telgia Juon, Ingrid Schütz, Laura Decurtins (da san.).

FOTO RTR, F. BELOTTI

«Tgea da tgànt» a Maton ha uss ina fundaziun

■ (rtr) La gievgia è vegnida fundada la fundaziun «Tgea da tgànt». Quella vul transfurmar la chasa paterna da l'anteriur cumponist Tumasch Dolf a Maton en ina chasa culturala che po vegnir duvrada da chors, persunas da la cultura e da fautors da la musica rumantscha. La nova fundaziun vegn presidiada da *Telgia Juon*, la biadia da Tumasch Dolf. Plinavant èn en il cussegl da fundaziun l'istoricher *Sebastian Brändli*, la musicologa *Laura Decurtins*, l'anteriur deputà dal cussegl grond *Jon*

Pult, la musicista *Corin Curschellas* ed *Ingrid Schütz* ch'è musicista e presidenta da la Cuminanza culturala Val Schons. La fundaziun surpiglia ina part dal bajetg, la part da *Menga Dolf* e quella da *Telgia Juon*. Las anteriuras cumparts dal bajetg restan en possess dad auters commembers da la famiglia che ston anc comprar lur participaziun. Sco quai che *Julian Reich*, il manader dal post per la promoziun da la cultura «Cultura Viamala», ha ditg sajan ins il mument vi d'elavurar in plan da fatschenta che du-

ess sclerir tut ils detagls. La renovaziun da la chasa e dal clavà vegn a custar ardund trais milliuns francs. La chasa duai er avair ina u duas abitaziuns da vacanzas e per il clavà datti ina segunda varianta cun remplazzar dal tut il clavà empè da renovar el. Quai procura per daplì segirezza dals custs da construcziun. Tar la populaziun fruntia il project sin gronda simpatia. Empermischuns per summas pli grondas n'haja la nova fundaziun però betg anc survegni, uschia *Julian Reich*.